

VENDIM
Nr. 666, datë 10.10.2019

**PËR KUOTAT FINANCIARE TË USHQIMIT NË MENSA E KONVIKTE DHE
PËRCAKTIMIN E KRITEREVE PËR PËRFITIMIN E BURSIVE E TË PAGESAVE
PËR NXËNËSIT E ARSIMIT PARAUNIVERSITAR, SI DHE FORMAT E TJERA TË
PËRKUJDESJES NDAJ KATEGORIVE TË VEÇANTA NË INSTITUCIONET
ARSIMORE PARAUNIVERSITARE PUBLIKE**

*(Ndryshuar me VKM nr. 752, datë 30.11.2019, nr. 854, datë 24.12.2019; nr. 511, datë
27.7.2022; nr. 493, datë 26.6.2026)*

(I përditësuar)

Në mbështetje të nenit 100 të Kushtetutës, të nenit 19, të ligjit nr. 69/2012, “Për sistemin arsimor parauniversitar në Republikën e Shqipërisë”, të ndryshuar, të pikës 2, të nenit 32, të ligjit nr. 15/2017, “Për arsimin dhe formimin profesional në Republikën e Shqipërisë”, të nenit 5, të ligjit nr. 10289, datë 17.6.2010, “Për mënyrën e trajtimit ekonomik e financiar dhe për dhënie ndihme të menjëhershme familjeve të punonjësve të Policisë së Shtetit, të Gardës së Republikës, të Shërbimit të Kontrollit të Brendshëm, të Policisë së Mbrojtjes nga Zjarri dhe të Shpëtimit, të Forcave të Armatosura, të Shërbimit Informativ Shtetëror dhe të Policisë së Burgjeve, që humbin jetën në krye apo për shkak të detyrës”, të nenit 2, të ligjit nr. 7889, datë 14.12.1994, “Për statusin e invalidëve të punës”, të ndryshuar, të nenit 6, të ligjit nr. 8153, datë 31.10.1996, “Për statusin e jetimit”, të ndryshuar, të nenit 8, të ligjit nr. 8098, datë 28.3.1996, “Për statusin e të verbrit”, të ndryshuar, të nenit 8, të ligjit nr. 8626, datë 22.6.2000, “Statusi i invalidit paraplegjik dhe tetraplegjik”, të ndryshuar, të nenit 12, të ligjit nr. 57/2019, “Për asistencën sociale në Republikën e Shqipërisë”, dhe të ligjit nr. 99/2018, “Për buxhetin e vitit 2019”, të ndryshuar, me propozimin e ministrit të Arsimit, Sportit dhe Rinisë dhe të ministrit të Financave dhe Ekonomisë, Këshilli i Ministrave

VENDOSI:

1. Nxënësit, të cilët ndjekin studimet në institucionet arsimore publike të arsimit parauniversitar, mund të përfitojnë bursë dhe përfitime të tjera, të parashikuara në këtë vendim nga buxheti vjetor i miratuar për ministrinë përgjegjëse për arsimin dhe ministrinë përgjegjëse për arsimin profesional.

2. Nxënësit, të cilët ndjekin arsimin parauniversitar me kohë të plotë dhe arsimin e mesëm profesional në institucionet arsimore publike, përfitojnë bursë brenda kuotave dhe kriterëve, si më poshtë vijon:

2.1 Kriteri ekonomik:

a) nxënësit e arsimit parauniversitar, të cilët ndjekin procesin mësimor në largësinë mbi 5km nga vendbanimi i përhershëm i tyre, që plotësojnë kriterin ekonomik, sipas pasqyrës nr. 1, që i bashkëlidhet këtij vendimi, dhe që akomodohen në konvikte publike. *Për nxënësit në arsimin profesional nuk zbatohet kushti i akomodimit në konvikte publike;*

b) nxënësit e arsimit parauniversitar, të cilët banojnë në zonat rurale që nuk kanë shkollë 9-vjeçare brenda rrezes prej 5 km, të cilët plotësojnë kriterin ekonomik, sipas pasqyrës nr. 1, dhe që akomodohen në konvikte publike;

c) *nxënësit, fëmijë të familjeve në nevojë, që janë regjistruar në arsimin bazë, por në pamundësi financiare, nuk ndjekin arsimin bazë.*

2.2 Kriteri i rezultateve të arritura:

Nxënësit e arsimit profesional, të cilët kanë mbaruar vitin shkollor paraardhës me notën mesatare 9 (nëntë) deri në 10 (dhjetë).

2.3 Kriteri joekonomik:

a) nxënësit, të cilët kanë përfituar statusin e jetimit;
b) nxënësit, të cilët kanë humbur kujdestarinë prindërore me vendim gjykatë të formës së prerë;

c) Nxënësit, të cilët gëzojnë statusin ligjor të invalidit paraplegjik dhe tetraplegjik, si dhe nxënësit me aftësi të kufizuara, të vërtetuar nga komisioni mjekoligjor;

ç) nxënësit, të cilët gëzojnë statusin ligjor që nuk shikojnë apo nuk dëgjojnë;

d) nxënësit, fëmijë të personit/personave që gëzojnë statusin e invalidit;

dh) nxënësit e pakicës kombëtare romë dhe egjiptiane, të cilët regjistrohen dhe ndjekin arsimin e mesëm profesional;

e) nxënësit, të cilët janë identifikuar dhe trajtuar si viktimë të trafikut të qenieve njerëzore dhe kanë humbur kujdesin prindëror;

ë) nxënësit, fëmijë të punonjësve të Policisë së Shtetit, Gardës së Republikës, Shërbimit të Kontrollit të Brendshëm, të Shërbimit të Mbrojtjes nga Zjarri dhe të Shpëtimit, Forcave të Armatosura, Shërbimit Informativ të Shtetit dhe të Policisë së Burgjeve, të cilët kanë humbur jetën në krye dhe për shkak të detyrës;

f) nxënëset (vajza), të cilat ndjekin drejtimet mësimore mekanikë, elektroteknikë, elektronikë, përpunim druri, gjeodezi, shërbim mjete transporti, termo-hidraulikë;

g) Nxënësit me një prind, kur njëri prej prindërve nuk jeton.

gj) Nxënëset, të cilat regjistrohen në arsimin profesional në të gjitha drejtimet mësimore, përjashtuar ato që përfitojnë nga shkronja "f", e këtij vendimi, trajtohen me 50% të bursës.

Në fillim të çdo viti shkollor, por jo më vonë se muaji nëntor i çdo viti, Ministria e Brendshme, Ministria e Drejtësisë, Ministria e Mbrojtjes, Shërbimi Informativ i Shtetit dhe institucionet e përkujdesjes sociale rezidenciale publike, për këto kategori nxënësish, duhet të dërgojnë në institucionet arsimore ku ata ndjekin procesin mësimor si dhe në njësitë e vetëqeverisjes vendore përkatëse listën e nxënësve përfitues sipas pikës 2.3 të këtij vendimi.

2.4 Kriteri i degëve parësore të zhvillimit ekonomik të vendit dhe vendbanimit të përhershëm:

a) nxënësit, të cilët ndjekin me kohë të plotë arsimin profesional në drejtimet mësimore bujqësi, veterinari, pyje, ndërtim, peshkim, detari, gjeologji-miniera dhe shpim e shfrytëzim i vendburimeve të naftës dhe gazit;

b) Shfuqizuar.

3. Nxënësit e të gjitha kategorive të mësipërme në arsimin e përgjithshëm nuk përfitojnë bursë ose humbasin të drejtën e përfitimit të saj kur:

a) janë ndarë nga trugu familjar;

b) familjet e tyre ushtrojnë veprimtari private;

c) deklarohen mbetës apo përsëritës dhe humbasin vitin shkollor për arsye të rezultateve jokalue.

3/1. Për nxënësit në arsimin profesional zbatohen shkronjat "a" dhe "b", të pikës 3. Humbja e bursës për rezultate shkollore zbatohet vetëm në rast përsëritjeje të vitit shkollor.

4. Njësitë e vetëqeverisjes vendore, për uljen e nivelit të braktisjes shkollore, për nxënësit që janë regjistruar në arsimin bazë, por, në pamundësi financiare nuk ndjekin arsimimin, miratojnë bursa financiare me përfitues nxënësit, fëmijë të familjeve në nevojë, pas konfirmimit nga mësuesi kujdestar dhe drejtori i shkollës për frekuentimin e procesit mësimor, si dhe nga zyra vendore e arsimit parauniversitar.

5. Njësitë e vetëqeverisjes vendore, për kategorinë e nxënësve që janë regjistruar në arsimin bazë, por, në pamundësi financiare nuk ndjekin arsimin bazë, dhe për uljen e braktisjes

shkollore të arsimit bazë, mund të miratojnë dhe të shpërndajnë bursa edhe nga fondet e veta ose nga fondet buxhetore të përfituara në formën e transfertës së pakushtëzuar.

6. Ministria përgjegjëse për arsimin, në fillim të çdo viti shkollor, në konsultim me institucionet arsimore, harton planin e shpërndarjes së bursave për nxënësit e arsimit parauniversitar, të cilin e dërgon në njësitet e vetëqeverisjes vendore, jo më vonë se muaji tetor.

7. Ministria përgjegjëse për arsimin profesional, në fillim të çdo viti shkollor, në konsultim me ofruesit publikë të arsimit profesional, harton planin e shpërndarjes së bursave për hyrjet e reja, të cilin e dërgon në njësitet e vetëqeverisjes vendore, jo më vonë se muaji tetor.

8. Njësitet e vetëqeverisjes vendore, bazuar në planin e përcaktuar sipas pikës 6, të këtij vendimi, me vendim të këshillit bashkiak, miratojnë dhënien e bursave, sipas kriterëve të përcaktuara në pikat 2.1, 2.2, 2.3 e 2.4, të këtij vendimi.

8/1. Në rastet kur numri i nxënësve që ndjekin arsimin e përgjithshëm, që plotësojnë kriteret për përfitimin e bursës, është më i lartë se mundësitë e financimit të miratuara për atë vit shkollor dhe njësia e vetëqeverisjes vendore nuk mund të mbulojë me fondet e veta mbështetjen për të gjithë nxënësit që plotësojnë kriteret, njësia e vetëqeverisjes vendore, me vendim të këshillit bashkiak, përcakton rregullat për shpërndarjen e bursave dhe gjysmëbursave, sipas kategorive të përcaktuara në pikën 2, të këtij vendimi.

9. Bursat e nxënësve për vitin e parë (klasën e 10) shqyrtohen dhe miratohen nga këshilli bashkiak, sipas vendbanimit të përhershëm të prindit/nxënësit, përfitues të kuotës financiare/kuotës ushqimore (bursës).

10. Nxënësit, të cilët kanë përfituar bursë vitin e parë (klasën e 10) me vendim të këshillit bashkiak ku ata kanë vendbanimin e përhershëm, të cilëve nuk u ndryshojnë kriteret ekonomike dhe nuk rezultojnë mbetës, e përfitojnë bursën deri në përfundim të viteve të shkollimit. *Bursë përfitojnë edhe nxënësit në klasën XI e lart, që nuk kanë përfituar bursë në vitin e parë dhe përmbushin kriteret, sipas këtij vendimi.*

10.1 Bursat e nxënësve për klasën XI e lart, në arsimin profesional, rishqyrtohen dhe miratohen çdo vit nga këshilli bashkiak, sipas vendndodhjes territoriale dhe administrative të shkollave profesionale apo konvikteve ku ata ndjekin arsimin. Rishqyrtimi përfshin edhe nxënësit që përfitojnë për herë të parë bursë në klasën XI e lart, në rastet kur plotësojnë kriteret e përcaktuara në këtë vendim.

11. Nxënësit e shkollave profesionale, të cilët ndjekin vitin e dytë në drejtimet mësimore bujqësi, veterinar, pyje, ndërtim, peshkim, detari, gjeologji-miniera dhe shpim e shfrytëzim i vendburimeve të naftës dhe gazit, dhe nxënëset (vajza), sipas shkronjës "F", të pikës 2.3, të cilët kanë përfituar bursë në vitin e parë dhe në vitin shkollor paraardhës nuk rezultojnë mbetës, përfitojnë bursë deri në përfundim të viteve të shkollimit.

12. Të gjithë nxënësit/prindërit paraqesin kërkesat për përfitimin e bursës pranë drejtorive të institucioneve arsimore, të cilat dokumentojnë me procesverbal pranimin e tyre, dhe një kopje e procesverbalit i jepet kërkuarit. Drejtoritë e institucioneve arsimore, për nxënësit që regjistrohen për herë të parë në klasën X, të cilët përfitojnë bursë sipas kriterëve të përcaktuara në pikat 2.1, 2.2, 2.3 e 2.4, të këtij vendimi, i dërgojnë zyrtarisht kërkesat për miratimin e bursës në njësitet e vetëqeverisjes vendore të vendbanimit të përhershëm të nxënësit. Për nxënësit e klasave të tjera, që kanë përfituar më parë bursa, depozitojnë dokumentacionin për vijimin e përmbushjes së kriterëve.

13. Nxënësit, të cilët gjatë periudhës së zhvillimit të praktikës mësimore kanë përfituar bursë nga njësia e vetëqeverisjes vendore, e përfitojnë atë edhe gjatë periudhës së zhvillimit të praktikës profesionale. Bursa jepet në formën e kuotës ushqimore ose të kuotës financiare, në emër të prindit/prindërve ose të përfaqësuesit ligjor, për llogari të nxënësve, të çelur pranë bankave të nivelit të dytë.

14. Njësitë e vetëqeverisjes vendore duhet t'u dërgojnë zyrtarisht, jo më vonë se muaji dhjetor i çdo viti, drejtorive të shkollave të arsimit profesional dhe zyrave vendore të arsimit parauniversitar vendimet për dhënien e bursave, të shoqëruara me dokumentacionin përkatës.

14.1 Shfuqizuar.

15. Njësitë e vetëqeverisjes vendore duhet të raportojnë zyrtarisht, çdo tre muaj, pranë ministrisë përgjegjëse për arsimin për fondet buxhetore të shpenzuara dhe numrin e nxënësve të arsimit parauniversitar dhe të arsimit profesional, që trajtohen me kuota ushqimore në konvikte dhe bursa.

15/1. Njësitë e vetëqeverisjes vendore dorëzojnë kërkesat për fondet e bursave brenda muajit mars.

16. Për nxënësit, të cilët kanë përfutur bursë, drejtorët e shkollave të arsimit profesional si dhe të shkollave të tjera të arsimit parauniversitar dërgojnë zyrtarisht, në datën 5 të çdo muaji, pranë njërive të vetëqeverisjes vendore, informacion për frekuentimin e shkollës/praktikës profesionale nga nxënësit që përfitojnë bursë.

17. Nxënësit, të cilët kanë përfutur statusin ligjor të jetimit, nxënësit e Institutit të Fëmijëve që nuk Dëgjojnë dhe të Institutit të Fëmijëve që nuk Shikojnë, përfitojnë çdo vit, falas, veshmbathje, libra dhe fletore, sipas pasqyrës nr. 4, që i bashkëlidhet këtij vendimi. Nxënësit e Institutit të Fëmijëve që nuk Dëgjojnë dhe të Institutit të Fëmijëve që nuk Shikojnë përjashtohen nga detyrimet e tarifave të shërbimeve të ndryshme, që ofrojnë institucionet shtetërore.

18. Nxënësve, të cilët kanë përfutur statusin ligjor të jetimit, invalidit paraplegjik, tetraplegjik, statusin ligjor të personave që nuk shikojnë, të personave që nuk dëgjojnë, u sigurohen falas akomodimi/fjetja, shërbimi shëndetësor, shërbimi dentar dhe medikamentet pas paraqitjes së librezës, kartës shëndetësore dhe epikrizës, nga qendra spitalore e rrethit.

19. Nxënësit jetimë, të cilët ndjekin procesin mësimor në institucionet publike të arsimit parauniversitar, trajtohen me pagesë suplementare edhe për periudhën e pushimeve verore nga njësitë e vetëqeverisjes vendore, sipas vendndodhjes territoriale.

20. Nxënësit e pakicës kombëtare rome dhe egjiptiane, të cilët ndjekin shkollat e mesme profesionale, përfitojnë falas veshmbathje, libra dhe fletore, sipas kuotës financiare të përcaktuar në pasqyrën nr. 4, që i bashkëlidhet këtij vendimi.

21. Nxënësit dhe mësuesit e institucioneve të arsimit special, me nevoja të veçanta psiko-sociale, pa konvikt, trajtohen me fonde të buxhetit të shtetit, me një kuotë ushqimore (drekë) me vlerë deri në 150 (njëqind e pesëdhjetë) lekë në ditë, sipas kuotës financiare të përcaktuar në pasqyrën nr. 4, që i bashkëlidhet këtij vendimi.

22. Nxënësve të arsimit parauniversitar, të cilët banojnë në zonat rurale që nuk kanë shkollë 9-vjeçare brenda rrezes prej 5km dhe që akomodohen në konvikte publike, bursa u jepet në formën e kuotës ushqimore. Në asnjë rast, bursa nuk jepet në formën e kuotës financiare.

22/1. Njësitë e vetëqeverisjes vendore, me fondet e tyre buxhetore apo transfertës nga buxheti i shtetit, për institucionet arsimore parauniversitare publike në territorin që mbulojnë, kanë të drejtë të ofrojnë shërbimin e ushqimit për nxënësit, në përputhje me standardet dhe rregullat e miratuara nga autoritetet përgjegjëse për ushqimin.

23. *Fondet buxhetore për mbulimin e shpenzimeve të bursave administrohen nga njësitë e vetëqeverisjes vendore, sipas vendndodhjes territoriale dhe administrative të shkollave dhe konvikteve, ku nxënësit ndjekin mësimet. Pagesa mujore e bursës bëhet sipas përcaktimeve të mëposhtme:*

a) Nxënësit përfitojnë kuotat financiare (bursa), sipas normave në natyrë për ushqimin e nxënësve në konvikte dhe shpenzimeve vetjake, sipas pasqyrës nr. 3. Masa e bursës përlllogaritet si prodhim i kuotës ushqimore me ditë qëndrimin në konvikt, për jo më shumë se 10 (dhjetë) muaj kalendarikë, në proporcion me ditë qëndrimin në konvikt;

b) Nxënësit që nuk jetojnë në konvikt dhe që plotësojnë kriteret për bursë përfitojnë vlerën e plotë të bursës mujore, e cila u paguhet pranë bankave të nivelit të dytë, në llogarinë bankare të prindit/prindërve ose përfaqësuesit ligjor, për llogari të nxënësit çdo muaj, brenda datës 10 (dhjetë) të muajit pasardhës. Masa e bursës për këtë kategori jepet në pasqyrat nr. 2, për arsimin e përgjithshëm, dhe nr. 2/1, për arsimin profesional, që i bashkëlidhen këtij vendimi dhe janë pjesë përbërëse të tij.

23/1. Në rastet kur fondet e disponueshme të njësisë së vetëqeverisjes vendore nuk janë të mjaftueshme për të mbuluar të gjitha kërkesat e pranuar, njësia e vetëqeverisjes vendore miraton gjysmë bursë, me vlerë 50% të kuotës së plotë mujore, duke respektuar rendin e përparësisë së kriterëve të përcaktuara në këtë vendim dhe rregullat e miratuara nga Këshilli i NjVV-së.

24. Nxënësve, të cilët përfitojnë bursë sipas rezultateve të arritura, jashtë kriterit ekonomik, të akomoduar në konvikte ose jo, masa e miratuar e bursës mujore u paguhet nga njësia e vetëqeverisjes vendore çdo muaj, pranë bankave të nivelit të dytë, në llogarinë bankare në emër të prindit/prindërve ose të përfaqësuesit ligjor, për llogari të nxënësve.

25. Nxënësve, të cilët përfitojnë bursë në arsimin profesional, sipas shkronjave “dh” e “f”, të pikës 2.3, dhe shkronjës “a”, të pikës 2.4, masa e miratuar e bursës mujore u paguhet nga njësia e vetëqeverisjes vendore çdo muaj, pranë bankave të nivelit të dytë, në llogarinë bankare në emër të prindit/prindërve ose të përfaqësuesit ligjor, për llogari të nxënësve.

26. Njësitë e vetëqeverisjes vendore realizojnë pagesën e bursës mujore për nxënësit përfitues vetëm pasi drejtorët e shkollave profesionale konfirmojnë zyrtarisht, brenda datës 5 të çdo muaji, pranë njërive të vetëqeverisjes vendore, informacionin për ndjekjen e shkollës/mësimin për nxënësit që përfitojnë bursë.

27. Nxënësve, të cilët nuk ndjekin mësimin/shkollën apo praktikën profesionale pa shkaqe të ligjshme, u ndërpritet bursa menjëherë.

28. Masa e bursës dhe kuota financiare ushqimore ditore për nxënësit jepet, respektivisht, sipas pasqyrave nr. 2 dhe nr. 3, që i bashkëlidhen këtij vendimi.

29. Ministria përgjegjëse për arsimin profesional jep në total jo më pak se 5 000 (pesë mijë) bursa në vit për nxënësit e arsimit profesional, nga të cilat 2 500 (dy mijë e pesëqind) bursa janë të dedikuara për hyrjet e reja në shkollat profesionale të sistemit arsimor publik.

30. Ministria përgjegjëse për arsimin, për të gjitha kategoritë e nxënësve, të cilët ndjekin arsimin parauniversitar, të parashikuara në pikën 2, të këtij vendimi, pa përfshirë nxënësit që ndjekin shkollat profesionale, jep jo më pak se 1200 (një mijë e dyqind) bursa.

30/1. Duke filluar nga viti 2027, kuota mujore e bursës për të gjithë përfituesit, sipas pikave 2.1, 2.2, 2.3 dhe 2.4, të këtij vendimi, indeksohet çdo vit nga njësitë e vetëqeverisjes vendore, në bazë të normës vjetore të inflacionit të publikuar nga INSTAT-i për vitin paraardhës. Ministrinë përgjegjëse për arsimin parauniversitar dhe atë profesional përlllogaritnin fondin e nevojshëm të bursave, përfshirë edhe indeksimin, dhe njoftojnë njësitë e vetëqeverisjes vendore për masën e normës së inflacionit që do të aplikohet, në përputhje me pasqyrat që i bashkëlidhen këtij vendimi dhe janë pjesë përbërëse të tij, si dhe me normën vjetore të inflacionit të publikuar nga INSTAT-i.

31. Efektet financiare të këtij vendimi përballohen nga fondet e buxhetit të shtetit, miratuar për ministrinë përgjegjëse për arsimin dhe ministrinë përgjegjëse për arsimin profesional.

31.1 Përfitojnë bursë në masën 15 000 (pesëmbëdhjetë mijë) lekë në muaj nxënësit, të cilët ndjekin arsimin parauniversitar dhe arsimin e mesëm profesional në institucionet arsimore publike, anëtarë të familjes së personave që kanë humbur jetën ose janë shpallur të zhdukur në qarqet Durrës, Tiranë dhe Lezhë, si pasojë e tërmetit të datës 26.11.2019. Institucionet arsimore vendore përkatëse, përgjegjëse për arsimin parauniversitar, në bashkëpunim me njësitë përkatëse të vetëqeverisjes vendore, identifikojnë nxënësit dhe dërgojnë listat e

nxënësve të identifikuar për miratim në ministrinë përgjegjëse për arsimin dhe ministrinë përgjegjëse për arsimin profesional.

32. Afati përfundimtar për shqyrtimin dhe miratimin e bursave nga njësitë e vetëqeverisjes vendore, për të gjitha kategoritë e shkollave, është muaji dhjetor.

33. *Vendimet e këshillave të njësive të vetëqeverisjes vendore miratohen, sipas afateve të përcaktuara në këtë vendim. Vendimet e këshillave të njësive të vetëqeverisjes vendore, të miratuara përtej afateve, përballohen me fondet e tyre.*

34. Vendimet e njësive të vetëqeverisjes vendore bëhen publike në faqen zyrtare të institucionit për nxënësit/prindërit/përfaqësuesit ligjorë, komunitetin, median dhe institucionet e tjera qendrore apo vendore, publike ose private.

34/1. *Grupet vulnerabël të nxënësve përfitojnë, sipas pikës 1, të këtij vendimi, mbështetje nga punonjës të caktuar nga institucionet arsimore vendore, përgjegjëse për arsimin parauniversitar, në rolin e mediatorit për këto grupe, për t'i mbështetur në funksion të ndërgjegjësimi dhe të përmirësimit të aksesit të tyre në arsim. Mediatorët shërbejnë për të përmirësuar komunikimin dhe bashkëpunimin midis grupeve vulnerabël dhe institucioneve të arsimit parauniversitar, në funksion të rritjes së frekuentimit të procesit mësimor.*

34/2. *Institucionet arsimore vendore, përgjegjëse për arsimin parauniversitar, sipas pikës 1, të këtij vendimi, u ofrojnë nxënësve romë dhe egjiptianë programe të veçanta pas mësimit për kryerjen e detyrave mësimore ose marrjen e mësimeve plotësuese.*

35. Ngarkohen Ministria e Arsimit, Sportit dhe Rinisë, Ministria e Financave dhe Ekonomisë, njësitë e vetëqeverisjes vendore, institucionet arsimore vendore, përgjegjëse për arsimin parauniversitar, si dhe ofruesit e arsimit të mesëm profesional publik për zbatimin e këtij vendimi

Ky vendim hyn në fuqi pas botimit në Fletoren Zyrtare.

**ZËVENDËSKRYEMINISTËR
Erion Braçe**

PASQYRA NR. 1
KUSHTET EKONOMIKE TË NXËNËSIT PËR DHËNIEN E BURSËS
(Ndryshuar me vendimin nr. 511, datë 27.7.2022; nr. 493, datë 26.6.2026)

Nr.	Përbërja familjare	Përfitojnë bursa	Përfitojnë gjysmëbursa	Me pagesë
		Me të ardhura mujore, lek/frymë	Me të ardhura mujore, lek/frymë	Me të ardhura mujore, lek/frymë
1	Për familjet me 2 persona	deri 5 000	5 000–5 500	mbi 5 500
2	Për familjet me 3 persona	deri 4 700	4 700–5 300	mbi 5 300
3	Për familjet me 4 persona	deri 4 600	4 600–5 100	mbi 5 100
4	Për familjet me 5 persona	deri 4 500	4 500–5 000	mbi 5 000
5	Për familjet me 6 persona	deri 4 300	4 300–4 800	mbi 4800
6	Për familjet me 7 persona	deri 4 000	4 000–4 700	mbi 4 700
7	Për familjet me 8 persona	deri 3 700	3 700–4 500	mbi 4 500

PASQYRA NR. 2
MASA E BURSËS PËR NXËNËSIT (NË LEK)
(Ndryshuar me vendimin nr. 511, datë 27.7.2022; nr. 493, datë 26.6.2026)

Nr.	Kategoritë e shkollave	Masa mujore e bursës për nxënësit që plotësojnë kriteret 2.1, 2.2, 2.3 dhe 2.4
1	Shkollat 9-vjeçare dhe të mesme	
	a) Bursa	7 500

	b) Gjysmëbursa	3 750
2	Shkolla e Mjeshtërisë Sportive e Arsimit Special	
	a) Bursa	9 100
	b) Gjysmëbursa	4 550
	c) Me pagesë	-
3	Për nxënësit jetimë	9 000

PASQYRA NR. 2 /1
MASA E BURSËS PËR NXËNËSIT NË ARSIMIN E MESËM TË ARSIMIT PROFESIONAL
(NË LEK)
(Shtuar me vendimin nr. 493, datë 26.6.2026)

Nr.	Kategoritë e bursave sipas shkollave	Masa mujore e bursës për nxënësit që plotësojnë kriteret 2.2; 2.3 dhe 2.4	Masa mujore e bursës për nxënësit që plotësojnë kriterin ekonomik (kuotë ushqimore)	Shpenzime vetjake (higjienë personale, mjete mësimore)	Totali i financimit nga shteti për masën mujore të bursës për nxënësit që plotësojnë kriterin ekonomik (kuotë ushqimore)
1	Shkollat e mesme profesionale				
	a) Bursa	10 000	9 300	700	10 000
	b) Gjysmëbursa	5 000			5 000
	c) Me pagesë	0	9 300	700	10 000

PASQYRA NR. 3
KUOTAT FINANCIARE SIPAS NORMAVE NË NATYRË PËR USHQIMIN E NXËNËSVE
(Ndryshuar me vendimin nr. 511, datë 27.7.2022; nr. 493, datë 26.6.2026)

Nr.	Emërtimi	Njësia matëse	Norma ditore	Vlera energj. (kcal)	Çmimi i ri (lek/kg)	Vlera ditore (lek)
1	Bukë	gram	375	977	120	45
2	Makarona	gram	30	107	208	6
3	Oriz	gram	30	109	186	6
4	Sheqer	gram	40	157	90	4
5	Fasule	gram	30	93	300	9
6	Perime	gram	130	27	200	26
7	Fruta	gram	100	42	160	16
8	Vaj	gramë	30	270	200	6
9	Gjalpë	gram	20	152	900	18
10	Mish	gram	75	115	956	72
11	Djathë	gram	25	40	1,100	28
12	Reçel	gram	20	93	240	5
13	Vezë	kokërr	1	42	24	0

14	Qumësht	gramë	200	98	140	28
15	Patate	gram	200	170	78	16
16	Nënprodukte mishi	gram	30	100	953	29
Kuota ditore ushqimore						312
Shpenzime vetjake (higjienë personale, mjete mësimore) → 650 lek/muaj						22
TOTALI MUJOR (vlera ditore × 30 ditë + shpenzime vetjake)						10,000

PASQYRA NR. 4
KUOTAT FINANCIARE TË VESHMBATHJES

Nr.	Emërtimi	Kuota financiare në lekë e veshmbathjes për një vit kalendarik
1	Për fëmijët e arsimit special	7,000 (shtatë mijë) lekë
2	Për nxënësit që ndikojnë në nivelin e braktisjes shkollore që janë “rikthyer” në institucionet arsimore.	10,000 (dhjetë mijë) lekë
3	Për nxënësit romë dhe egjiptianë	10,000 (dhjetë mijë) lekë
	Për nxënësit jetimët	10,000 (dhjetë mijë) lekë